

29 SEP 1998

PEMUDA UMNO PERAK SOKONG PERHIMPUNAN DI BUKIT JALIL

IPOH, 29 Sept (Bernama) -- Pergerakan Pemuda Umno Perak akan menghantar seramai mungkin anggota pergerakan itu ke perhimpunan Perdana Pergerakan Pemuda Umno di Stadium Bukit Jalil di ibu negara pada 10 Oktober ini.

Naib Ketua pergerakan itu, Syed Abu Hussin bin Hafiz Syed Abdul Fasal berkata, kehadiran anggota pergerakan itu adalah sebagai menyokong keputusan Perdana Menteri, Datuk Seri Dr Mahathir Mohamad dalam isu pemecatan timbalannya, Datuk Seri Anwar Ibrahim.

Pergerakan Pemuda Umno Perak menyokong penuh dan yakin terhadap kepimpinan Naib Ketua pergerakan itu, Datuk Hishamuddin Tun Hussein dalam menerajui pergerakan pemuda, katanya dalam satu kenyataan di sini.

Syed Abu Hussin yang juga Ketua Pergerakan Pemuda Umno Bukit Gantang berkata, Pemuda Perak berharap Hishamuddin dapat membawa pergerakan itu ke landasan asal perjuangan parti, memulih semula semangat juang pemuda bagi menjana dan mempertahankan maruah parti dan orang Melayu.

Beliau juga meminta semua anggota pergerakan itu supaya tidak terpengaruh dan terbabit dalam mana-mana perhimpunan haram yang dianjurkan oleh penyokong Anwar.

"Saya merasa kecewa di atas perhimpunan haram yang dibuat oleh penyokong Anwar di Taiping baru-baru ini dan meminta anggota pergerakan pemuda bahagian itu tidak terlibat dalam mana-mana perhimpunan haram", tambah beliau.

--BERNAMA

LAT oba